

摘藻堂四庫全書薈要

集部

欽定四庫全書薈要卷一萬六千九十一

集部

遺山集卷二十九

金 元好問 撰

碑碣

顯武將軍吳君阡表

君諱璋字器玉姓吳氏石晉末有官獻州從少帝北行者又自遼陽遷泰州其子孫遂為長春人六世祖匡嗣遼開府儀同三司同中書門下平章事陳國公五世祖

吳咸雍十年劉霄榜登科仕未達而歿四世祖敬良潛德不耀子讓東頭供奉官贈安遠大將軍即君之曾祖也祖鐸閤門祇候金朝天會中左班殿直考德元貞元中監崞縣烟火公事贈明威將軍妣傅氏濮陽縣太君君即明威之元子也生七歲而孤養於其姑樂亭齊氏稍長即能自樹立大定十年以廕補官歷遂城滿城四務酒官明昌四年調保州軍器庫使改太原大備倉副使泰和初以六品諸司差監歷城稅課最遷濟南軍資

庫副使轉鄧州草場副使會錄事缺員父老狀於州請
君攝司事不期月政成郡人以吏能稱焉衛紹王即位
用大安需恩官顯武將軍騎都尉濮陽縣男食邑三百
戶因為所親言吾猥以賞延入仕將四十年得不償勞
寧不自知徒以先君子蚤世不及通顯故強顏末秩耳
今品及列爵當預追錫之典生平之志畢矣今不自止
欲何求耶乃投牒請老武勝節度高侯雅知君勸止之
曰選法廕子五品例入一差隨有超擢君淹筦庫久能

少忍之且當被百里之命何求去之決耶君不得已起
調得監方城稅到官不數日以崇慶元年五月二十五
日春秋六十有五終於官舍君資孝友姑氏歿哀過所
生識者以為生長見聞宜有加於人者為人誠實樂易
重然諾輕施予有以急難來歸者必極力營贍之以故
家屢貧然不卹也少日酒不能亂中歲以止飲自誓賓
客過門歡宴彌日不見情容人尤以此多之身歿之日
識與不識皆為之嗟惜名士赴吊者數十人其得人心

又如此夫人某郡張氏閨門肅睦有內助之効封濮陽
縣君後君二十年而歿子男二人長仲侃忠顯校尉次
仲傑鄧州教授孫七人曰綱曰維既冠而卒曰綽曰綰
曰續曰級皆早卒繼僧未名仲傑將以某年月日奉公
之柩歸祔於大興府宛平縣玉河鄉黃村里之先塋歲
甲辰冬予過洛西仲傑涕泗百拜以墓碣銘為請仲傑
學為通儒德為善人殆維其有之是以似之者乃為論
次之并用予之所感為作銘其銘曰

我足天衢彼責守問我器函牛彼求柱車論族膏腴卒
不能以自濡筦庫之須仕無他途選部一拘同滯賢愚
然則前日之所謂任子者非敝法也與

忠武任君墓碣銘

前泌陽令任嘉言亨甫狀其考忠武君之行涕泗百拜
謂某言先君子棄養十年惟是轉徙南北不得以時安
厝今北還矣期以明年春勉卒大事墓當有碣碣當有
銘敢以謬述為請某於亨甫有州里通家之舊不可以

不敏辭乃為論次之并著予之所感焉按任氏世為汾陽人有諱才珍者登天會六年進士第由洪洞令入為尚書省令史皇統中坐吏部田侍郎穀之黨歿於貶所田初為朝廷所倚用慨然以分別流品慎惜名器自任羣小積不能平造作飛語構成大獄鍛鍊田以下伏首惡者八人以敢為朋黨誑昧上下擅行爵賞之權皆置極刑自餘除名為民杖決徙遠方者又二十八人明昌初始蒙昭雪洪洞預贈典復朝散大夫生子微以廕補

官監惠民司君即惠民之元子也諱德懋字君範資稟醇雅有受學之質弱冠就舉屢為鄉府所薦惠民蚤世事繼母無間言泰和南征以良家子被推擇署軍中千夫長積官忠武校尉已而罷歸間居鄉里愈更樂易雖在愚幼皆知其為善人君子嘗為人言先大夫以直道立朝橫被羅織自明昌昭雪之後右丞蘇公而下凡二十有六家往往將絕而復續稍微而更盛吾知吾子孫必不獨為神理所遺也乃力課亨甫學其後果以正大

庚寅收世科

關

鄉里榮之中歲之後即置家事不問惟

日誦般若而已積習既久靈應昭著休咎多前知之避
貞祐之亂於鄜於京兆以天興壬辰五月十有六日春
秋六十有七終於鄧州之寓舍臨終遺命以所誦經內
懷中續息定家人發哀良久復開目云經安在家如言
奉之怡然而逝其明了如此先娶柳氏再娶劉氏子男
三人長即亨甫次震亨鼎亨皆早亡女一人適士子白
季昌皆柳出也亨甫以某年奉君之柩祔於郡西南洪

哲里之東原嗚呼朋黨之禍何其易起而屢作也宣政
之季蔡京呂惠卿輩至指司馬丞相為元祐姦黨魁列
其姓名著之金石自謂彰善癉惡可為萬世臣子不忠
不孝者之戒碑石甫立隨為雷火所擊惠卿等懼大禍
將及乃赦黨人死者復官流徙者復還自今觀之元祐
黨禁不過追削竄逐禁其子弟不得至京師而已曾不
若皇統之禍之慘也余嘗深求讒夫之心而後知讒之
所以為病者蓋心魄既喪粹為謾疾所乘嘗糞為甘嗅

足為香口鼻耳目皆失所守而不自知謾疾不已矯亢
忌嫉合而為聖癩始於天地一我卒之古今一我敢為
大言居之不疑造大謗起大獄視正人端士若有血讐
骨怨期必報而後已苟可以售其術雖殺身滅親亡人
之國有不恤焉者余觀於成敗之變多矣自有天地以
來未有食人而不為人所食者凡為讒夫者其才智類
出於人遠甚寧不知事有必至理有固然乃今至於殺
身滅親亡人之國而莫之卹焉者獨何歟殆受病既深

至於中風狂走雖和扁操萬金良劑亦無如之何耳古語有之憂心悄悄愠於羣小又曰朕聖讒說殄行震驚朕師又曰惡利口之覆邦家者蓋聖人之所惡又其所甚畏也人無所不至惟天不容偽姦人敗類交亂四國作於其心害於其事不有人禍必有天刑生為天下所咀嚼死為海內所痛快唯遺臭無窮是所得耳蔡呂諸人欲以黨議誣天下士而天下反以不預溫公黨為恥又欲以黨禍絕士大夫之世而後之名卿才大夫賢

宰相皆出於黨人之門然則為朋黨之論者其亦未之思歟銘曰

善為吉先壽為福元有子而賢卒歸骨於九原惟其有之是以似之吾得推其源至於人衆勝天而天定亦能破人者盍當以家為知言

信武曹君阡表

己酉秋九月予以事來燕都行臺叅佐曹侯椿年持其先人信武君事狀再拜涕泗為予言往者過太原嘗以

宗人益甫咫尺之書之故得見顏色時先人始就安厝
欲求阡表以昭示永久而未敢也側聞從者在燕將往
拜之而邂逅於此今願竊有請焉案事狀益甫所撰益
甫予同舍郎其言可信不妄且曹侯之意甚賢故為次
論之君諱元字長卿曹氏世為隰州隰州之以貴雄鄉
里者累十數代矣曾大父秀妣張氏大父繼純賢而有
文以善人獲稱妣郭氏朱氏何氏朱氏宋朝散大人某
之女父鎮資仁厚有士風妣靳氏張氏生子五人君其

第五子也齟齬受學年十二孤初父病革獨念君未有
所立殊以為憂及父沒君持喪如成人未幾母卒勺水
不入口者累日廬墓側至終喪鄉黨稱焉其後兄弟析
居君力學自奮不數年博通經傳以至陰陽醫藥法理
之學無不精至為人謹厚舉動不碌碌喜賓客好施予
周急繼困不責報謝郡長吏而下皆推重焉兄楨既老
君事之惟謹疾則躬侍湯藥存拊諸孤更為調贍有間
之者君不聽曰鄉人不能自存者且當救之況兄之子

乎貞祐之兵隰州破羣不逞之徒乘亂剽掠君具牛酒
集壯士得千人約曰吾州被兵惟州倖獨存今逃匿他
境吾欲與公等立州事迎倖以歸可乎衆曰諾乃安集
境內還倖於州羣黨破散遺民賴之以安有欲推君為
官長者君義而却之明年大飢民無所於糴君出所餘
以救餓者全活不勝計而初不一錢取也興定己卯秋
八月二十四日將適終陽遘疾終於途春秋四十四夫
人霍氏同郡檢法某之女閨門肅睦內助之力為多君

歿之兩月州乃陷盡室被俘惟椿年調官京師夫人給
兵士言我主婦蟄財所在當盡指侶餘人何所知以故
家人得少寬夫人私語之曰若等自為計吾老矣終不
能苟活以重吾兒憂遂俱兵士至其家正色言曰吾家
父子皆食官祿吾殺身以報可矣財豈可得耶兵士怒
縛之夫人罵不絕口而死生子三人長即椿年次松年
大年一女嫁郡人周惠今為真定叅謀椿年大安中出
粟佐軍仕為綏德令階五品得贈君信武將軍某縣男

夫人縣太君松年大年俱以兄廕祇候承奉班諸孫皆
尚幼孤子等實以己亥十一月十有九日葬君某里某
原之先塋夫人祔焉銘曰

孝子之志慈且祥仁者之勇直且剛衣冠堂堂百夫之
防無移官之階而有為政之方施於閨門義存義亡凜
凜皚皚崑玉秋霜墓石有銘德潛而光我卜曹宗偕隰
川其未央

千戶喬公神道碑銘

公諱惟忠字孝先涿州定興人大父恩父順世為農家
而以義俠見稱公資稟沉默見於童幼及長驍勇善騎
射志膽堅決輩流中少見其比衛紹王大安初北鄙用
兵良家子有以戰功取階級夸示鄉閭者公慷慨奮發
不甘落其後乃棄家事不問俠游燕趙間貞祐南渡河
朔板蕩豪傑競起公從今萬戶張公聚族屬鄉曲保西
山之東流竭別自為一軍及張君副經畧苗公道潤承
制封拜公亦受定遠大將軍恒州刺史居無幾何國兵

由紫荆而南張公以馬跌被執而公不知其守東流者如故也大帥以張公至塢下諭公使降公盛為禦備日戰數十合力盡乃降張公先以公為爪牙且嘉其忠憤不撓力為保全益以腹心倚之宋將彭義斌既破東平隨據大名聲勢甚張南北軍待為勍敵無敢試之者一日義斌提銳卒數千北向猝與公遇於真定之南公以騎數百直前挫其鋒義斌懾焉武仙劫殺主帥並山郡縣反為金張公會諸道兵擊之公時攝帥府事將騎五

百步卒三千鼓行而西聞敵將保郎山行列方整殆不可犯公謂部曲言歸師而過之兵家所禁不若設伏山下開其歸路彼得路則無鬪志吾邀擊之取獸於穴得志必矣已而敵兵過公出其不意大敗之如公所料時別將有陷陣中者公以單騎出之不旬日諸叛者日繼降附進逼真定仙懼南奔轉戰逐北遂攻彰德彰德下畧地齊魯駐軍滕州之牙山紅衲軍夜至公獨搏戰奮戈大呼營中驚奮皆殊死鬪衲軍敗走填壓山谷間無

慮數百人益都之役宋援兵數萬將及城下公逆戰走之獲軍資甚衆城中軍突出將為掎角公隨以短兵遮擊敵退保不復出大帥會諸將特稱公之勇以褒異之先是張公開幕府滿城公為元帥都監以功遷左副元帥及師還兼行兩安州帥府事移軍唐縣鎮遏西山者累年辛卯冬南渡河戰於陽翟之三峰山明年圍汴梁汴梁圍解公北渡天興軍北渡平章布色攻圍衛州公力戰卻之河南平張公入覲公復攝府事從征淮右

歲甲午朝廷第功張公因陞奏臣之副喬惟忠出入百戰功最多乞加寵擢於是特恩以寶書金符授公行軍千戶自是愈自奮勵其破棗陽攻光黃率以先登被賞張公勇而有謀能得士死力每以方畧授公使戰公亦稟而後行故所至克捷幕府統城三十遭離喪亂人物憔悴而能生聚教育使之去愁嘆而就妥妥安出于翼贊者為多計公之功蓋不特攻城戰野而已也公生而孤事太夫人某氏孝敬純至問安視膳躬侍湯藥士大夫

以為知禮壬寅秋丁內艱適在病中比襄事哀毀骨立用是病增劇竟以丙午年五月二十有七日春秋五十有五終于正寢越某日權厝順天城東之某原娶大名毛氏廣威將軍潞州錄事之女閨門肅睦中表以為法子男五人長珪襲公職出屯河南次日珪順天路人匠總管雄州新城等處長官次琇皆毛出也次璋次琳女五人長適千戶賈某早卒次女繼焉亦毛出也次適聶氏餘在室男孫三人女孫一人皆尚幼公美須髯舉止

詳雅有素宦之風恬於喜怒未嘗見於色每戰勝將佐
共為欣快而公初不以功伐自高其攻黃州也宋兵乘
昏莫奄至公率銳卒與戰主帥命舉火視之見青甲而
黃馬者戰甚力而不知為公也明日懸賞求之公竟不
自言其推讓又如此太夫人素慈仁事佛老惟謹教公
毋妄殺重惜物命公亦視母意所在以寬厚從事所捕
生口多縱遣之冠氏李君玉先在俘中問知為士人即
館之門下令授諸子學古人北面降虜者今真見之常

以時俗侈靡相尚中歲以來尤尚純素出入會計見之
朱墨者率無浮費之妄然人以緩急來赴者必重為賙
給負責則往往折券以貸之識者謂公孝以安親忠以
立節義以扞難仁以濟物視履考祥必當敷龐耆艾五
福具備今祿不酌庸壽不符德者乃如此天之量報施
可易量耶孤子某等以某年月日祔公於東王里之先
塋以僕辱在葭莩之末以神道碑為請乃為伴右之其
銘曰

沈鷺其姿角逐其時鬱無所施豪傑以為資成周既
東日薄崦嵫志橫潰之獨障勢一木之弗支義釋嚴
顏殆天使之大邦維藩虎臣桓桓爪牙方張而傅之羽
翰蛇矛突前奮力如湍堅陳枯株名城彈丸有來創罷
革膚靡完豺狼荆棘挈之安安我恩我威爾煦爾寒疾
疫剛瘳孰我敢干北方之強碣石盤盤戰功曰多公與
不刊勒銘豐碑以永後觀重侯兮累將戛戛乎厥初之
難

千戶趙侯神道碑銘

河朔用武之國自金朝南駕文事掃地後生所習見唯
馳逐射獵之事莅官政者或不能執筆記名姓風俗既
成恬不知恠惟侯在軍旅中日以文史自隨延致名儒
考論今古窮日夕不少厭時或投壺雜詠揮麈清坐倡
優雜戲不得至其前又子弟之可教者薄其徭役使得
肄業而邑文人亦隨而化之行臺所統百城比年以來
將佐令長皆興學養士駸駸乎齊魯禮義之舊推究源

委蓋自侯發之侯諱天錫字受之姓趙氏世為冠氏人

曾祖諱存金國初官保義校尉祖諱誠明昌中歲飢發粟賑貧為鄉曲所歸考諱林貞祐之亂以鄉豪保冠氏有功大名主帥用便宜授縣令階忠顯校尉歿于王事事見先塋碑此不具載侯即忠顯君之次子也趙為大族大安末侯始弱冠即入粟佐軍補修武校尉監洺水縣酒罷官歸遂為縣防城提控屬大朝兵勢浸盛避於洺水洺州防禦使蘇政召幕下擬克冠氏令耕稼既廢

城邑無所恃乃挈縣人壁桃源天平諸山以辛巳春歸
大行臺特進公于青崖固行臺聞侯之名隸帳下從征
上黨以功授冠氏令俄遷元帥左都監仍兼前職甲申
宋將彭義斌據大名屢以兵來侵人心頗搖侯謂業已
事行臺公不可以貳兵勢雖不振姑少避其鋒以圖後
舉耳乃率將佐往依大將布埒軍未幾破義斌于真
定授右副元帥同知大名府路兵馬都總管事階鎮國
上將軍乙酉八月復還冠氏先是故帥李泉為義斌所

攻既降之矣大軍至怒其反復有屠城之議侯救護百
至老幼數萬竟得全活時泉已在大名不數月又結蘇
椿輩納河南軍從宜鄭倜主兵柄日以取冠氏為計侯
每戰每勝氣不少衰某月倜自將萬人來攻侯率死士
乘城力戰三晝夜倜度不能下乘大風晦冥而遁己丑
五月朝于北庭所上便民事皆優詔從之行臺公亦以
其論列且當尤加重焉壬辰正月黃龍埧失利將佐千
餘人被俘侯皆以計活之又明年用行臺公薦宣授行

軍千戶仍賜金符戊戌南征駐兵蘄黃間被病還以庚

子夏五月二十有四日春秋五十終于縣治之正寢娶

杜氏封某郡夫人子男六人長復亨次泰亨貢亨柔亨

萬亨幼未名女二人長嫁東平路鎮撫軍民都彈壓吳

答里甲幼在室侯資重厚造次必以禮事太夫人孝意

所嚮必奉之惟恐不及撫存幼孤皆使有所立孤女亦

擇時貴嫁之在軍中二十年未嘗妄咎一人誅殺不論

也人有以急難來歸者力為調卹之脫之于奴虜活之

于屠戮者前後不勝算他日有負之者亦不以為意也
初縣經喪亂之後荆棘滿野敝衣糲食與士卒同甘苦
立城市完保聚合散亡業單貧備禦盜賊勸課耕稼所
以安集之者心力俱盡經畫既定上下如一四境之內
獨為樂土賓客至者燕享犒勞肅然如太平官府禮成
而退皆相與稱嘆以為侯之材蓋有大過人者矣大槩
侯所長者甚多所以自待者殊不薄又其所與游皆天
下名士氣節之所感激論議之所薰習鷹揚虎視自當

有萬里之望百未一出竟齎志以歿此有識之士所以
深悼而屢嘆也孤子復亨等以某年十二月庚寅朔舉
侯之柩葬於保義里之先塋禮也既已事以予嘗得幸
于其先人辱以神道碑為請予往客平陽者六年歲戊
戌七月以叔父之命將就養于太原侯留連鄭重數月
不能別軍行河平予與之偕分道新鄉置酒行營中夜
參半把燭相視不覺流涕之覆面也明日使人留語云
欲與吾子別而情所不忍唯有毋相忘而已於是疾馳

而去不反顧嗚呼此意其可忘哉乃為之碑而系之以
銘銘曰

趙侯翩翩蚤有稱乘時雲風志騫騰伯府選勞迺進
登樹之旗旄冠汝懲大縣萬家既分崩疲瘞之民侯
所矜摩拊不給矧暴陵逋亡日來月有增田野載闢
歲載登昔無粗麻今纊繒賓禮師儒講顏曾奕邑子
弟前伏膺絃歌洋洋通薛滕東州百城文治興繁誰
弘之侯所弘仁心為質莫我能躬不受祉豈所應孰

為除之又孰乘我侯種德既有徵趙方亢宗理可憑
咨爾嗣人其敬承

故帥閻侯墓表

辛丑元日子方客東平載之盛為具名予及大興張聖予
祁人宋文卿東光句龍英孺鎮人劉子新太原崔君卿
渾源劉文季壽春田仲德輩飲於家之養素齋載之先
病於酒醫者戒勿飲然其所致客皆名士樂籍又京國
之舊飲既洽談諠間作坐客無不滿引舉白者載之懽

甚不自顧藉亦復大醉明日疾暴作一仆地遂不起載
之資樂易不近貨利與人交無大小能得其懽心以故
來哭者皆為之盡哀將葬孤子德榮請于予曰先人得
幸吾子前日之飲亦惟子之故今大故矣忍使之隨世
磨滅耶予即為叙其平生使刻之石載之姓閻氏先諱
輪後有所避改名珍上世有自太原官于上黨者因而
家焉考諱謹鄉人以孝直稱娶邢氏生四子載之其第
三子也少穎悟知讀書及長仕州縣累至公府掾上黨

公開壁馬武砦遣別將李松守潞州壬午三月東平行

臺嚴公偕國兵畧地上黨公巽懦不能軍乘夜潰圍而遁載之醉不及從明日父老請載之主州事遂以城降行臺授宣武將軍潞州招撫使當是時州人數萬八縣又以千百計非載之知權變則其禍有不可勝言者矣尋有譖于行臺者以為載之多歛部民金而私貯之行臺按籍問之其出入皆有朱墨可尋行臺直之加懷遠大將軍元帥左監軍兼同知昭義軍節度使事先太師

承制封拜載之用行臺薦授輔國上將軍左副元帥昭
義軍節度使佩金虎符且命載之積糧數萬選壯士數
千守潞州馬武軍頻出攻北兵大帥懼守者不能堅乃
命遷州人真定散處潯水之上恒山公仙既降復謀南
歸乃刼載之送馬武上黨公開頗知載之叅佐諸人又
為之出力乃釋不誅放之河南河南破載之復歸行臺
公留之東平載之雖失侯故將而公以賓從處之凡燕
犒賞賜無不預浮沉酒間者十年卒以樂死時年五十

七娶常氏有子二人長即德榮次義榮女一人嫁為進士王得臣妻卒後三十日權葬府五里之某原銘曰

不崖岸而孤不邊幅而拘不藪澤而枯不木石而愚身為鷗夷日與酒俱憤則以舒燥則以濡虛舟悠然聽其所如六合遽廬八荒庭除蝸左區區化而大庭之居亦何知須臾之非萬期而萬期之不須臾彼有衣而弗婁有車而弗驅溘死中涂他人是娛顧雖不死殆暴齒露骼鬼籍而強行者歟

遺山集卷二十九

謹案卷二十八一頁後八行額葉圖舊作訛夷朵

哈濟舊作合只松丹舊作遜丹今並改 二頁

前一行賽瑪爾堪舊作斜迷思干布哈爾舊作

普花兒扎穆嚕舊作噍木連今並改 七頁前

一行衆僧努舊作衆僧奴今改後倣此 九頁


前四行赫舍哩阿古舊作尅石烈阿虎今改

十一頁前五行德遜舊作得孫今改 前六行

克酬舊作効徹希卜蘇舊作斜不出今並改

前七行阿嚕舊作阿魯錫訥舊作習捏今並改
十二頁前六行布薩舊作僕散今改





總校官庶吉士臣張能照

校對官編脩臣閔惇大

校對官檢討臣龔大萬

謄錄監生臣任益春

謄錄監生臣李士勲

欽定四庫全書薈要

集部

遺山集卷

三十一

詳校官助教臣謝登雋



欽定四庫全書薈要卷一萬六千九十二

集部

遺山集卷三十

金元好問撰

碑碣

濮州刺史畢侯神道碑銘

乙卯秋八月予來自鎮陽東平叅佐王君璋以畢侯叔
賢之子之子婿來請曰侯之葬久矣墓當有銘以吾子
於侯有一日之雅敢以屬筆使不隨世磨滅為幸也按

畢氏本易人其遷永清者不知其幾昭穆矣侯諱某叔
賢其字也大父某父某皆以農為業貞祐之亂侯年甫
十一從其親避兵至濟南之章丘猝為游騎所馳因逃
難散走濟南總管成侯江得侯草間愛其風骨不凡子
養之時宰相蕭國侯公摯行尚書省事於東平成侯隸
焉侯因被蕭公指使少長知讀書且習於省寺衣冠文
物之盛故能自樹立如成人興定戊寅宋軍出漣水益
都宣撫使田公瑑會兵進擊侯從成侯而東以功補昭

信校尉遙授章丘尉田公知侯姓名署軍中都統張林
反山東土崩宋保寧節度李全入據益都用為帳前都
統換承信郎遷統制丁亥國兵圍益都城中食盡保寧
計無所出閉戶將自經侯排戶直前曰公死城即破大
兵一縱城中無噍類矣太師日望公降公降必不死何
惜屈一身而不為數十萬生聚之地乎保寧悔悟隨詣
軍前太師受其降悉以全境付之而不戮一人竟如侯
所料者先相崇進以太師命召成侯成侯從之而西自

是奉公周旋戮力一心不間夙夜公信倚之如家人父子佗部曲莫能比也凡畧地于澶淵于淮楚于徐亳于歸德侯無不在亦皆以功遷先相資剛嚴威望素重人有往愬者率以不測為憂侯曲為營護使得自安至於決重刑亦時得與議貫貸未減前後不勝數侯不自言亦無能知者妖人李佛子之獄註誤萬人已會諸鎮兵守之長清三日不與食將盡誅之矣侯言之先相愚民自陷於死尚有可哀其老幼何罪垂死之命恃公如父

母一言之重人獲更生之賜何忍坐視而不抹乎先相
惻然感動為之別白故悞剖決生殺力所不及且以金
繒贖之故被僇者不能什三四侯與有力焉事先相首
尾十五年行臺得承制封拜自行軍總領遙授鄒平齊
河兩縣令裒翼總領提領本路僧道累官宣武將軍癸
巳先相命侯復畢氏之姓時其父及妣王氏亂後病歿
於章丘邑人以侯故收瘞之至是始備展省之禮立新
塋於魯城之東原追贈如故事庚子嗣相莅事以總府

都提領出為臨清令丙午復充左總領遷懷遠大將軍
遙授濮州刺史求解軍職改營屯都總領以便之甲寅
選充本路課稅所長官幹局既優歷練亦久不事苛細
而曹務畢舉時議稱焉是歲十二月之二十七日不幸
遇暴疾卒於崇仁坊之私第得年五十有五娶納合氏
鎮國上將軍鎮西軍節度使思列之女封河南縣君子
男一人曰守約業進士女二人長嫁府學生張守謙其
幼在室孤子守約以今年正月二十一日舉侯之柩祔

於新塋之次禮也侯性忠厚敬老慈幼出於自然家所
有臧獲得於南中之生口者多放之自便一毫無所取
與人交有終始終身不言短長皆人所難能然予獨取
其有及民之功者為之銘銘曰

鬱鬱佳城東澗之阿畢氏有子姬姓故家維侯之初
童子執戈童子執戈而大事克荷青社食殫九虎磨
牙非排戶直前噍類奈何鄭公堂堂高山大河不怒
而威有物禁訶侯承事之子職有加敏給赴功而秉

心柔嘉從容一言陰慘化而陽和合散扶傷疲拊瘡
摩曾是殿屎載笑載歌功歸所天不以自夸若夫興
哀無知之場援手高懸之羅計長清之所全活竝青
社為尤多不龍不蛇而有賢人之嗟積厚而報不豐
神理為差汶耶濟耶其未涯耶公侯之世必復其始
者尚信然耶

宣武將軍孫君墓碑

君諱慶字伯善姓孫氏世為濟南人曾大父某大父某

考榮皆隱德不仕君資稟信厚蚤有成人之量鄉父兄
以起宗期之貞祐之亂先相光祿公壁青崖山君挈家
往依焉以對問當公意得隸帳下公所戰攻降下餘五
十城君皆從焉指使既久為所倚信部曲諸人少與為
比大名彭義斌乘濟鄆耕稼廢倉無見糧悉衆守之公
審度事勢與之連和義斌拜公為長強之而西公密遣
騎卒告難于國兵大帥大帥聞報率數千騎來援與義
斌遇於贊皇之西山兵刀甫接君獻計於公曰援兵既

至我當入北軍以張其勢成敗在此舉幾不可失也公
即馳赴之將士氣倍皆殊死鬪大名軍遂潰義斌投死
無所尋即授首不數日故地盡復公時承制封拜乃授
君忠武校尉濟南府軍資庫使改行尚書省應辦使壬
辰遷武畧將軍威捷軍都指揮使兼巡捕事公猶以贊
皇之功為未報也再加宣武將軍己亥遷本路鎮撫軍
民副彈壓兼行東平府錄事君莅事嚴明有能吏稱然
性剛直與時多忤卒見罷去今行臺公念君先相舊人

不宜久在退閒復都指揮使及巡捕事未幾以疾告公
又惻然憫之且謂君長子天益嚮學知義理氣節不凡
命代父仕而君之疾竟不治以某年月日春秋五十有
七終於私第之正寢娶薛氏封富春縣君後君八年卒
子男三人天益天瑞天寵女一人嫁金鄉縣丞樂珍男
孫五人德安翁安壽安世安永安孤子等以某年月日
舉公之柩葬於長清縣黃山之新阡遵治命也癸丑之
冬予以行臺之召東來天益謂予頗知其先人持府學

教授康侯顯之誌文見示涕泗再拜以墓碑之銘為請
按康侯所載君所善二人其一充人劉德潤其一潞人
閻載之德潤仕行臺詳議官二十年家無餘財病且歿
泣為君言遭離喪亂無歸顧之望曾大父以來皆在白
殯身後獨一老嫗在渠安能辦此吾死不瞑目矣君慨
然曰吾子無慮我當任其事及德潤歿君為之送終并
塋三世一如平生之言此予所親見者載之失侯故將
落魄嗜酒身沒之後家貧子幼無以為葬君感念疇昔

營護喪事威儀繁盛祖祭填塞與時貴無異亦予所親
見者維君事長如此與人交又如此又得康侯謨述其
不朽也必矣尚何俟於不腆之文因辭不敢當天益三
請益堅度不可以終辭乃強為論次之其銘曰

鷙勇兮翩翩纓縵胡兮事戎旃許公驅馳死生必前魏
寇來攻孰擣其堅君於其間知犄角之權材官蹶張發
機其先齊五十城之復與有勞焉迄今贊皇之謀弦聲
騞然鬱鬱佳城樂石千年誌以康侯之文賁彼下泉顧

雖志節之所自致其亦出於有子而可傳

龍山趙氏新塋之碑

歲癸酉冬十月先太師以王爵統諸道兵長驅而南兵及永清都元帥金紫光祿大夫史公首倡大義建開國之功太師承制封拜命公開幕府駐軍高州又明年春正月破北京龍山降今真定路工匠都總管趙侯振玉在籍中遂隸金紫公幕下侯雅以幹局為公所知選署龍安府庫使改永安令遷軍中都提控乙酉春公遭變

侯及從兄真定府判官真玉脫身走滿城衆推金紫公
季弟玉路萬戶帥本軍其六月復真定八月命侯招降
臨城杏樹等砦遂下邢趙兩州州民之在保聚者不啻
數千百家悉復故居幕府啟太師復趙州慶源軍之號
以侯為節度使兼趙州管內觀察使己丑十月改河北
西路按察使兼帥府叅謀辛卯秋復授慶源丁酉秋幕
府以侯前後功上於朝宣授今職癸卯冬十月侯介於
同官李稚川周才卿為予言吾趙氏世居保塞以仕遷

大梁五代末有諱匡穎者官至靜江軍節度使兼桂州
管内觀察使弟匡衡及八世孫襄疊仕於宋皆至通顯
金朝兵破大梁吾宗例為兵所驅盡室北行至龍山遂
占籍焉雖譜牒散亡而其見於祖塋石誌者蓋如此振
王之曾大父伸隱田間致貲鉅萬娶王氏生大父憲資
倜儻好施予人多以急難歸之娶馬氏生子八人吾父
琳其第四子也幼出大家頗以裘馬自恣為人知義理
排難釋紛有豪俠之風由大父而上皆葬鄉里振王之

考妣兵亂中權厝縣西佛寺比避兵還而寺屋被焚遂
失藁殯所在振玉去鄉餘二十年歸顧之理既絕感愴
霜露殯身無及向辱我公悞知承乏大郡安習既久眷
焉有桐鄉之戀乃用故事卜於平棘縣西北鄉蘇村里
之南原為顯考衣冠之藏日者室人冀氏物故因從祔
焉維遠祖自保塞遷大梁既無歲月可考自大梁遷龍
山則僅能志之今南原卜宅亦吾趙宗之大舉不勒之
金石以昭示永久後世其謂我何誠得吾子辱以文賜

之為幸多矣敢再拜以請自予北渡河時過慶源聞廟學之盛佗州郡莫與為比嘗往觀焉堂廡齋除像儀禮器遭離喪亂初若未嘗毀而又加飾焉問之諸生蓋一本於侯之經度出貲於家雇庸於民躬自督視寒暑不少懈數年而後乃克有成固以為賢於時之人遠矣范蕭兩煉師及叅佐諸人亦皆稱侯滿城之舉竭事君之節奮復讐之義獎勵士卒輯穆同異裨益之力為多初蒞慶源戶不能百為之披荆棘拾瓦礫招散亡立廬舍

勸課耕稼流通貿易西山羣盜時出剽畧侯深入搜討
州境晏然及入為叅佐豪猾無所顧忌有白晝殺人於
市者侯受命再至郡民鼓舞迎勞歌謠載路下車未幾
即按殺人者之罪赦怨家婦手刃以報之闔郡稱快故
言治郡之効者率以侯為稱首予竊嘆焉嗚呼兵禍慘
矣自五季以來明德雅望之後重侯系將之族靡滅所
存曾不能十之一然且狼狽於道路汨沒於奴隸寒飢
不能自存者不可勝數也趙氏固名族然先之以靖康

之兵繼之以貞祐之亂將絕而復續稍微而更熾葦功
羣從布列伯府以報施言之非先世有以開之耶趙侯
幼仕州縣乘時奮起遂有良民吏之目雖其材幹足以
自致推究源委益知世德之自矣夫忠以事上敬以蒞
官孝以顯親揚名義以慎終追遠是可書也乃為書之
且告之曰降福非難所以致之者為難致福非難所以
養之者為尤難予閱人多矣長劒拄頤大冠如箕以揖
讓人主之前可謂極矣其變也至一簪不得著身河潤

九里澤及三族名園甲第布滿州郡可謂盛矣其衰也
子孫或不得聚廬而託處是天道特未定也夫端正者
必以正其末善始者必以令其終古有之父作室厥子
乃弗肯構盖有任其責者矣為山九仞功虧一簣亦必
有任其責者矣夫江之發源也微至於放而與洞庭彭
蠡同波沛而與北溟南海同味特大川三百小川三千
有以廣之耳侯年運而往矣更事既多植節亦固誠能
廣興學之志充治郡之善進進而不已新新而不既他

日冢置萬家室祭三世當有鴻儒碩士如燕公昌黎公
者演招魂之辭而紀麗牲之碑至於不腆之文所以記
新塋者乃其濫觴耳趙侯其勉諸

冠氏趙侯先塋碑

冠氏帥趙侯錄其世次見屬曰貞祐之季中原受兵先
人忠顯君起田間有功於鄉里鄉里推為邑丞太中解
公以便宜行諸道升黜縣長佐謂先人統率有方莫有
犯之者言之招撫使宗室惟宥乃自丞遷而令大名所

統三州十一縣義軍吾兄顯署軍中都提控弟顯軍民
都彈壓仍佩銀符天錫亦以恩例補官於是吾趙宗固
以雄視於齊魏之間矣及六龍南駕豪傑並起大名東
平皆為大有力者所割據先人介於彊敵之間率創罷
之民而為城守計百誘而不變百戰而不沮人事既窮
與城俱陷槩之當世孰與倫比天錫既隸今行臺特進
公出入行陣頗著微効及再受父任而縣民人力又憊
於往時輒於他盜困於凶荒弱而振離而合立官府於

攘敘之際闢田疇於榛莽之域重為公所錄假之旌節
歲丁亥五月乃用故事上於臺承制之命榮及祖禰梁
君用之記贈官之事已備之矣惟是數世之殯昭穆具
舉松楸百年而有旌紀寂寥之嘆天錫無所似肖蒙賴
先世以武弁起身大懼前人之隱德無所發見將遂湮
滅宜有文辭以昭示來裔敢再拜以請按趙氏世為縣
人宋靖康初侯之曾大父諱存從高宗南渡以騎射得
召見數年後北歸換保義校尉鄉人至今以保義名其

居大父諱誠明昌中歲饑民無所於糴能出其家所有以活旁近忠顯君諱林喜賓客好施予負欠之家有貧不能償者率折券以貸之喪亂之後富商往往被掠乞丐道路無歸顧之望君悉資遣之風義所激州里稱嘆故有令丞之舉嗚呼兵興三十年河朔之禍慘矣盛業大德名卿鉅公之後遭罹元元遂絕其世者多矣僅得存者亦顛沛之不暇也趙侯居則食萬家之邑出則為千夫之長年未五十孫息滿前羣從自生齒而上餘七

十輩侯之姊氏乘時奮興所握萬夫如臂之使指錦衣
繡帽角逐於草昧之日東西數千里識與不識皆以女
王目之蓋先之以靖康後之以貞祐再涉大變嚮絕而
復續稍微而更熾不曰先世之所開則無以考天人之
際矣故予樂為之書雖然此予聞而知之者然也侯之
太夫人董資善良夙尚內典忠顯君之時中饋之位乃
為上僭者所奪於夫人也撓斥如媵侍凌轢如囚虜井
臼之事率躬親之如是積三十年夫人推之以夙業堅

之以苦行怡然委順惡言未嘗出諸口晝哭之後僭奪者故在反以其老寡而憐之時往慰藉且敕諸子事之惟謹既沒之後葬祭過禮無降殺之貶夫妬為婦之常而怨亦人之所必報不妬不報直千萬人而一耳況乎其奪也不以怨而以恩其報也不以直而以德不出於強勉不由於沽激傳記所載如是者幾人女有健婦之稱男有時豪之選期頤甫及福祿方來乃今野服蕭然脫屣世事躬不受祉其安歸乎予見而知之趙宗之所

積在此母矣因述侯之世并以夫人之事附之侯字受之今為東平左副元帥兼分治大名府路同知兵馬都總管事宜授行軍千戶官鎮國云戊戌歲七月初吉記

西寧州同知張公之碑

公諱榮祖字孝先姓張氏世為獲鹿人曾王父明王父顯父丙三世在野叔父帥府監軍昇少日以良家子充南征軍士貞祐改元之明年六飛南狩真定幕府得用便宜拜官取鄉曲之譽辟監軍為本縣尉及縣改西寧

州遷縣令未幾改代為今經畧使史侯所倚信累功至
監軍兼行西寧州事被檄招集未附為叛者所脅偃蹇
不屈竟及於難幕府存念勞舊以軍屬公兼領縣務時
年甫二十卓然有成人之量為人有志膽善騎射時輩
少有及者庚寅冬河平失利陷堅陣中率死士五十餘
人突圍而出所向披靡莫有當其鋒者流矢中面而鏃
不得出鑿者破骨取之神色不少變經畧公壯其勇以
為不減古人具以名聞遷總統巡山軍民千戶恒山公

仙壁雙門遣別將屯抱犢山宣權萬戶親以軍守之隘狹可上者十有八所而山上皆有備禦不便仰攻公期以三日破之乃潛軍由鳥道攀援而上出其不意山軍震蕩謂從天而下投死無所問知公名皆束手自歸黨與未盡者依太行為巢穴在所有之根結盤互時出剽掠旁近之民陰為齎助以紓焚劫之禍嘗乘隙入吾境公測其來設伏擊之軍卒踴躍而戰戮首領一人而擒其副餘衆悉降郡邑倚公為重亦得少安甲午歲大旱

百姓飢窘軍賦減於平時而終亦不辦公出粟代輸之
縣當關輔汾晉驛傳之衝供億倍於他邑公時以財給
之歛於民者什纔二三而已不幸遘疾以庚戌夏五月
日春秋四十有七終於私第之正寢先期自刻云吾明
日日中逝矣已而果然其明了如此夫人同邑戎氏子
男二人長曰伋次曰某孤子伋等以某年月日奉公之
柩葬於某鄉某原禮也公幼出大家以施予為常事故
其周急繼困不計有無賓客過門供給承事一出誠款

椎牛醺酒與相娛樂下迨廝養亦獲饜飫生平結交如
某人某人契分款密終始如一赴人之急如恐不及故
得其報力為多太原大帥郝侯氣岸高亢少所降屈一
見公結為昆弟不敢以爵齒自居公起身戎行不開文
墨裁決訴訟以情為斷不三數語而是非曲直立判未
嘗有留滯者凡所區處吏民奔走從事無敢墮窳言政
者不敢以武人槩之初監軍沒其子繼祖纔十歲公襲
其任三十年於今伋輩既冠婚矣公念為叔父所保養

生死報之屢以縣章讓繼祖至於再三辭旨懇切人為
感動經畧公不之許慰遣之曰轉輸期會急於星火應
卒之材為難況乎縣治繁劇須習慣然後可君雖不忘
叔父之惠如公家何及病且革復申前請幕府不得已
許之竊嘗謂風俗之壞久矣同父之人往往自為讐敵
血戰於錐刀之下顧肯以大縣萬家推之羣從之間乎
惟公不出於生長見聞之素而不階於教育講習之益
為能自拔於流俗如此雖曰未學君子謂之學矣是可

書乃為之銘云

重甲兩韃馳突翩翩唯勅敵是求而與相周旋虵矛
之所盪決莫當其前破骨出鏃不廢笑言一死鴻毛
效之所天劒服短後殆先趙之所然業業西山逋逃
之淵刁斗嚴更通曙不眠我軍之所撫臨人為息肩
大縣萬家意氣盛年敝屣千金食客四筵弟昆之交
金石其堅急難而赴之白刃空拳自世道下衰人理
絕焉同父子參商且百且千孰於禮服之羣從釋銅

墨而自捐戎行區區乃有士夫之賢惟不學而至於學
知氣質之渾全鬱鬱佳城海山之原我銘表之尚以信
無窮之傳

兗州同知五翼總領王公墓銘

東平軍民彈壓段遷狀其友王公生平屬予為墓銘曰
始遷與王同行伍年相若志相得故嘗約為兄弟王之
歿今十年遺女孤弱藁殯不克舉遷將以今年三月十
六日遷其柩於憲王陵之東幸吾子為誌之予謂朋友

之廢久矣自退之時大夫士以古人自期者不為不多
士之相與者宜若無愧然子厚請以柳易播事未嘗行
退之極口稱道若將曠世而不復見當時且然尚何望
於今之世耶古有之朋友死無所歸曰於我殯又曰久
要不忘平生之言亦可以為成人矣段武人也而能學
者所難能之事銘其可辭哉按總領諱德祿北京興中
府人世為農家貞祐癸酉以騎兵從錦州將王守玉屯
東平辛巳夏東平不守歸今行臺嚴公隸五翼軍以功

轉總領凡行臺畧地所在必以之從積六七年遷同知
兗州軍州事為人資善柔而戰陣勇捷人少有可敵者
甲申五月十五日與宋將彭義斌軍戰被創年三十二
以歿一女許嫁日照張左相之孫濱壽其葬也公感念
平昔贈以信武將軍云銘曰

突如其馳蕩如其麾馬革自隨非壯夫之悲魂兮來歸
汝友是依

五翼都總領豪士信公之碑

并引

大行臺特進公當朔南分裂之際合散亡一同異挈全
魏齊魯歸命有司乃得承制封拜麾下諸將剖符錫壤
懷黃佩紫者不可悉數今四十年矣凡公與之共功名
者往往取奇麗福艾之士然乘時崛起徼倖萬一舍短
取長為公所錄用翕忽變化由鼠而虎者抑多矣公亡
恙時拊罷瘵之民恒若不及繭絲所入務以給公上周
困亟業單貧奉賓客而已身服補紉之衣家無肉食之
奉故一時化之上而偏裨參佐下而閭巷細民莫不畏

公之威而効公之儉弓刀舊習為之一新蓋德風之所
偃有不得不然者若夫覆轍知戒迷途隨復嫉貪冒而
廉介歛雄夸而信厚掇餓推食臨深援手心之所安非
出於矯揉者猶以光祖為稱首云光祖諱亨祚姓信氏
光祖其字也魏公子無忌號信陵君子孫因以為氏北
史信氏有名都芳字玉琳者以藝術著稱後遂無顯人
光祖家上谷葬縣之榆河者不知其幾昭穆矣大父懷
陽父慶壽以貲雄鄉里有萬千之目好結交樂施予知

名燕雲間光祖幼有志膽不甘落人後貞祐兵興以良

家子係軍籍從平章政事蕭國侯公鎮天平蕭公還朝
不一二年國世淪敗它帥不能軍軍遂亂軍中有欲圖
光祖者光祖偕鄉曲千餘人壁梁山提控鄭侗來攻前
後三數月出入百戰未嘗挫衄聞光祖姓名者皆恐怖
毛豎個敗走自是歸光祖者益衆矣宋將彭義斌據大
名聲勢甚張頻以官賞誘降光祖策其坐談終無所成
不從以辛巳春歸特進公於青崖公知其可用署五翼

都總領佩金符奉檄招降石城為屯田經久之計濟南
軍來襲一戰敗之殺獲甚衆壬午守曹州不解甲踰三
年事定還帳下公破黃山取恩州先登陷陳光祖之功
為多東平食盡公與義斌連和光祖知事勢所在提孤
軍涉太行及太師於火炎義斌誅死光祖復從公東還
時劉慶福者猶為義斌城守太師進軍慶福敗第功遷
同知曹州軍州事官宣武將軍畫疆既定官府粗立且
無戰攻之事光祖給使左右特見保任公以兒子畜之

公治軍嚴動以軍法從事光祖從容救止多所全活徂
徠山司仙統戶萬餘因光祖自歸光祖受之秋毫無所
犯五翼號為難馭光祖統之久能得其歡心少有被笞
罰者軍之族屬萬家散處梁山徂徠之間光祖未嘗輒
至所部使有供張之勞生平不治生產至婢無完裋人
有以急難告者百方賙卹不計有無生口北渡道殣相
望作糜粥以救餓者思欲徧及之其仁心為質多此類
也幕府暇日日與文士歌酒相燕樂談笑謔浪不為小

廉曲謹人亦以此多之河南破家所購法書名畫無慮數十百種客至時出展玩欣然忘倦如畜未名之寶聞人談閑閑趙公書法愛而學之落筆即有可觀兒子入小學迤漸買書經史完備雖儒素家少有及者時譽既盛今相君方議擢用不幸遘疾以庚子夏六月二十有三日春秋四十九終於私第之正寢以其年九月十有四日舉公之柩葬於須城縣盧泉鄉金谷山東原之新阡禮也夫人竇氏真定甲族婦道母儀中表以為法子

男一人世昌須城令女二人長適某氏次適某氏男孫
三人曰同寅曰協恭曰和衷皆學舉業女孫一人幼在
室世昌受學於予以墓碑為請予謂光祖能教其子學
而世昌果以諸生釐戎務今十年大縣萬家調度百出
他人筋疲力涸有不能辦者世昌常有餘暇吏曹求代
者而不可得生子如此光祖為不亡矣黃金滿籬何足
道哉銘曰

排難解紛朱家俠聞百戰冊勲卿子冠軍收之棠榆

遂有濁涇清渭之分燕趙固多奇士尚有考於斯文

遺山集卷三十

欽定四庫全書薈要卷一萬六千九十三

集部

遺山集卷三十一

金 元好問 撰

碑 碣

清涼相禪師墓銘

清涼唐廢寺大定中第一代琇公開荆棘立之在兩山
間初無所知名琇歿後遂虛席久之西岩德來居德輩
流中號為楚楚者又屏山李公為之護持苟可以用力

則無不至而亦竟無所成蓋又一再傳而得吾西溪師
西溪道行清實臨濟一枝以北向上諸人至推其餘以
接物則又以為大夫士之賢而文者也山中人舊熟師
名及受請無賢不肖皆喜曰相禪師來清凉不寂寞矣
當是時諸禪方以貲雄相夸齋鼓粥魚之聲殷然山谷
間清凉儉狹僻左僅庇風雨石田不能百畝師一顧盼
而雲山為之改色向之相夸者皆自是缺然矣師諱弘
相出於沂水王氏幼即棄其家為佛子事沂州普照僧

祖照年十九以誦經通得僧服乃恣讀內外書凡十年
多所究觀聞虛明亨和尚住普照道價重一時乃盡棄
所學而學焉虛明知其不凡欣然納之又十年仍佩其
印出世住鄭州之大覺嵩山之少林沂州之普照最後
住清涼師勤於接納有諮決之者為之徵詰開示傾困
倒廩無復餘地故雖退居謝事而學者益親之以某年
月日示疾終於寢室閱世六十有四夏坐四十有六所
度十人曰義曰詰而為上首所證三人曰顯今嗣師席

曰靜曰雋所著文集三曰歸樂曰退休曰清涼并錄一卷傳諸方顯等以某年月日奉師遺骨塔於西溪之上以狀來乞銘凡此皆狀所言也初予未識師有傳其詩與文來者予愛其文頗能道所欲言詩則清而圓有晚唐以來風調其深入理窟七縱八橫則又於近世詩僧不多見也及登其堂香火間有程沂州戢名幡問之侍者云師與程遊甚款歿後歲時祀之予用是與之交嘗同遊蘭若峰道中談避寇時事師以為凡出身以對世

者能外生死然後能有所立生死雖大事視之要如翻覆手然則坎止流行無不可者此須從靜功中來念念不置境當自熟耳時小雪後路峻而石滑師已老力不能自持足一跌翻折而墜同行者失聲而莫能救直下數十尺僅礙大樹而止予驚問寧有所損否師神色自若徐云學禪四十年脚跟乃為石頭所勘聞者皆大笑然亦歎境熟之言果其日用事而不妄也予嘗論師之為人款曲周密而疾惡太甚人有不合理者必大數之

怫然之氣不能自掩平居教學者禪道微矣非專一而靜則決不可入世間學謾廢日力耳及自為詩則言語動作一切以寓之至食息頃不能忘此為不可曉者今年西堂成約予來習靜度此夏比京師歸而師歿矣惜予欲叩其所知而不及也乃為之銘曰

理性與融物迹與通不雷不霆有聲隆隆宴坐中林薇藿不充朝詩有瓢暮詩有筒澹其無心愈出愈工處順而老安常而終覺海虛舟莫知所窮嘗試臨西

溪楫層峰萬景前陳而白塔屹乎其中悠然而雲冷
然而風頽然而石鬱然而松彼上人者且未泯其音
容孰亡孰存孰異孰同招歸來而不可待眇月出兮
山空

華嚴寂大士墓銘

師諱惠寂姓王氏西河陽城里人為童子時白其父求
出家父定以一子故難之及長於佛書無不讀授華嚴
法界觀於汾州天寧寶和尚父歿乃祝髮居孝義之壽

聖時年已五十有一矣崇慶初以恩例得僧服俄賜紫
遂主信公講席學者日盈其門避兵南來居汝州之普
照又遷南陽之鄂城師以華嚴為業手抄全經日誦四
帙為課既客居徒衆解散獨處土室中而不廢講說人
有問之者云吾為龍天說耳龕前叢竹既枯而華隨采
隨生人以為道念堅固之感正大丙戌九月五日夜說
世界成就品明日以偈示衆告以寂滅之意且曰何從
而來何從而去於是右脇而化壽七十有九會葬萬人

所得舍利及它靈異甚多此不具錄起塔於普照華嚴
廣陽之大聖舞陽之弘教傳法界觀四人祖登法昌福
柔尼了遇落髮三人幸卯夏四月昌等因比丘尼淨蓮
求予銘其墓蓮即道學郝葉縣之甥父尉南陽秩滿棄
官翁媪及諸弟如漢上龐禪家說師平生於禪那有所
得故不與他義學僧同其言不妄也乃為之銘銘曰
大方無隅涉迹則偏攝一切法歸須漸圓究竟云何且
實且權彼上人者言外之傳於華嚴海為大法船一龕

宴居幽祇滿前曾是枯株秀穎鬱然靈塔相望有光燭
天鈴音演法普為大千

墳雲墓銘

南陽靈山僧法雲往在鄉里時已棄家為佛子遭歲飢
乃能為父母輓車就食千里母亡廬墓旁三年號哭無
時父歿亦然山之人謂之墳雲旌其孝也元光二年冬
十二月夜中僧給詣師求講法界觀明旦出門見庵旁
近雨雪皆成花大如杯盃狀居民聞之老幼畢集其在

磚瓦上者皆持去文士為賦詩道其事又山之東水泉
不給用講學者患之一日寺西岩石間出一泉衆謂純
孝之報也世之桑門以割愛為本至視其骨肉如路人
今師孝其親者乃如此然則學佛者亦何必皆棄父而
逃之然後為出家耶師臨汾人姓劉氏七歲不茹葷十
一出家于洪洞之圓明師僧智真二十五且戒受義學
於廣化僧慧學禪於韶山義公來南陽主崇勝之觀音
院住靈山為之起報恩寺以正大三年冬十二月十五

日壽六十四示疾而化弟子四人覺懿行思行了為上
首明年起塔於山前劉鄧州光父師鄉曲也知師為詳
托予銘其墓予以劉為不妄許可者乃為之銘銘曰
僧雲之來晉臨汾六年居廬哭親墳地泉感沸天花紛
孝聲香如世普薰何以表之今有文

孫伯英墓銘

伯英在太學時所與遊皆一時名士故相程公日新判
河南伯英居門下甚愛重之貞祐初中原受兵朝廷隔

絕府治中高庭玉獻臣接納奇士號為衣冠龍門大尹
復興基之會有為非語者云治中結客將據河以反遂
為尹所構凡所與往來者如雷淵希顏王之奇士衡辛
愿敬之俱陷大獄危有一網之禍伯英出入府寺人為
出死力者多故得先事遁去依殷輔之商州變姓名從
外家稱道人王守素會赦乃歸貞祐丙子予自太原南
渡故人劉昂霄景玄愛伯英介予與之交因得過其家
登壽樂堂飲酒賦詩尊俎間談笑有味使人久而不厭

伯英時年四十許困名場已久重為世故之所摧折稍
取莊周列禦寇之書讀之視世味益漠然矣予意其本
出將家氣甚高已折節為書生束以詩禮優柔饜飫偶
以蘊籍見名其鬱鬱不能平者時一發見如縛虎之急
一怒故在世已亂天下事無可為思得毀裂冠冕投竄
山海以高寒自便日暮途遠倒行而逆施之古人或為
抱關或仕執轡或妄從博徒賣漿者游其盡皆出於無
聊賴之至耳非本志也又明年客有來崧山者云伯英

真為黃冠師矣正大庚寅十月十九日歿于亳之太清
宮春秋五十有一因即其地葬之始祖堅國初以軍功
贈龍虎衛上將軍隴州刺史祖汝楫武畧將軍魯山令
父鈞武義將軍昌州鹽使司判官室劉氏前歿于璋堦
同郡王好禮伯英初名邦傑後改天和孫氏雄州容城
人居雒陽四世矣銘曰

馬逸愛駕犢健破車霸畧所貪世議之拘我足天衢彼
責守閭我材明堂彼求侏儒蚩蚩之與曹而昧昧之與

居俱腐草木孰別以區千百載而下或有擥蓬而問者
又焉知其輕世肆志自放於方之外以耗壯心而老歲
月歟

紫虛大師于公墓碑

有為全真之言者衛致夷狀其師離峰子之行請予為
墓道碑曰始言離峰子事長生劉君年未二十便能以
苦行自立丐食齊魯間雖腐敗委棄蠅蚋之餘食之不
少厭不置廬舍為定居計城市道塗遇昏莫即止風雨

寒暑不卹也吾全真家禁睡眠謂之煉陰魔向上諸人有脇不沾席數十年者吾離峰子行丐至許昌寄止岳祠通夕疾走環城數周日以為常其堅忍類如此嘗立城門之側有大車載橐栝而過者橐觸其鼻忽若有所省懽喜踴躍不能自禁為一老師鎖閉空室中三日乃止初不知書自是日誦數百言示之老莊隨讀隨講如迎刃而解不數年徧通內外學作為歌詩伸紙引筆初若不經意皆切於事而合於理學者至今傳之為人偉

儀觀器量寬博世俗毀譽不以闕諸心獨於周急繼困
解衣輟食恒若不及也南渡後道價重一時京師貴游
聞師名奔走承事請為門弟子者不勝紀正大中被旨
提點亳州太清宮賜紫虛大師離峰子之平生大畧如
此致夷將以某年月日葬師於洛陽長生觀吾子嘗許
以銘幸卒成之予在三鄉時蓋嘗望見離峰子於衆人
之中及官東南離峰子亦嘗寓書求予為錄章封事予
雅知若人樂與吾屬游思欲叩其所知而未果也且致

夷求予文有年矣今年復自聊城走數百里及予於濟
上待之者又累月子病懶於筆墨若謂有疑於其師者
然予於離峰子何疑哉予聞之今之人全真道有取於
佛老之間故其憔悴寒餓痛自黥劓若枯寂頭陀然及
其有得也樹林水鳥竹木瓦石之所感觸則能事穎脫
闕律自解心光熒然普照六合亦與頭陀得道者無異
故嘗論之夫事與理偕有是理則有是事三尺童子以
為然然而無是理而有是事載於書接見於耳目往往

有之是三尺童子不以為然而老師宿學有不敢不以為然者予誤夷堅志有平居未嘗知點畫一旦作偈頌肆口成文深入理窟者三數人黥卒販夫且然況念念在道者乎張內翰敏之離峰子舊也叙其歌詩曰師自以其言為道之棄物今所以傳者欲知此老林下百胝塵中幾蛻耳又曰悠然而風鳴汎然而谷應彼區區者或以律度求我是投天籟以宮商而責渾沌之斲丹青也吾友孫伯英河洛名士在太學日出高河南獻臣之

門若雷希顏淵辛敬之愿劉景玄昂霄其人皆天下選
伯英與之游頭角嶄然不甘落其後一見師即北面事
之竟為黃冠以歿張予所敬而孫予所愛也二君子且
然予於離峰子何疑哉乃為之銘離峰子諱道顯出於
文登于氏初隱觀津女几之桃花坪過洛陽得劉君舊
廬葺居之是為長生觀住太清宮三年避壬辰之兵於
盧氏漆水公迎致鄧下餓以疾終春秋六十有五離峰
其自號云

分食雞豚託處鼯蛇視身寇讐自干且羅樂有加耶年
可遐耶所持者狹而所獲奢耶豈無考槃在澗之阿木
茹草衣召來天和急而張之弦絕奈何學道之難成使
人咨嗟曰婦姑勃礫交喪則多千日之功或棄於毫末
之差彼避險而就夷背實而趨華拱壁以先駟馬不免
於道夸若人者不潰於流不磷於磨始於同氣闕弓終
以大方為家顧雖有墓於此安知其不冠青雲而佩飛
霞也耶

天慶王尊師墓表

尊師諱志常姓王氏恒心道人其自號也世為秀容西山水馬里人年十六七許時牧牛羊田間一道人曰來相就既與之熟問汝肯隨我往天壇否天壇神仙洞府勝似此間師雖幼聞之頗亦愛樂道人者即挈之而西是日薄暮至一城忽失道人所在問其地乃濟源也又問去天壇遠近人云百餘里耳師自度無所歸明日徑往入陽臺宮道衆問所以來師具言道衆駭其為異人

挈之能一日千里是夙有仙分留為香火童子八年乃
歸父母謂其死已久悲喜交集因送之天慶觀事王大
用佐材尊師資稟重厚不妄言笑冠服朴素若不以世
累為懷而內敏殊甚間讀史傳略知古今成敗留意醫
藥必以先所驗者告之天慶唐以來福地廢於貞祐之
兵及官府立尊師率其屬力為崇建規制峻整遂為一
州之冠兵間暴骨狼藉無復收瘞宣撫使劉公易假師
緣契為哀丘而祭之州里尤歸重焉尊師生大定壬午

又再閱二十九年顏渥丹須眉皓白飲食如少壯人客
至與談承平故事歷歷可聽識者謂異人得師童州中
必謂他日為受道之器故置之仙聖所廬敦龐耆艾今
既效矣以庚戌冬十一月十有八日沐浴易衣召弟子
告以後事留頌而逝某日寧神於州西北原守冲等為
植碑予用所知者為之銘銘曰

至人翩翩坐凌八遐惟其識初平於芻牧故不以長
房縮地而為夸道之所存不於泰奢必有敦龐耆艾

之士乃克負荷彼浮偽而淫采我悃悞而無華道如
自擇當孰舍耶使大方之家而無若人亦奚貴於大
方之家

冲虛大師李君墓銘

其畀也全其守也專以人合天以極乎自然若人者吾
不知其寂滅為樂如佛子之順世緣耶抑將乘冷冷之
風化栩栩之蝶與至人而仙也

通真子墓碣銘

通真子諱志安字彥容出於陵川秦氏大父諱事軻通
經博古工作大字為州里所推重父諱畧字簡夫中歲
困於名場即以詩為專門之學自號西溪道人詩殊有
古意苦於凋斲而無迹可尋當代文士極稱道之生二
子通真其長也自蚤歲趣尚高雅三舉進士而於得喪
澹如也避亂南渡西溪年在喜懼親舊以祿養為言不
獲已復一試有司至御簾罷歸正大中西溪下世通真
子已四十遂致家事不問放浪嵩少間取方外書讀之

以求治心養性之實於二家之學有所疑質諸禪子久之厭其推墮混漾中而無可徵詰也去從道士游河南破北歸遇披雲老師宋公於上黨畧數語即有契嘆曰吾得歸宿之所矣因執弟子禮事之受上清大洞紫虛等錄且求道藏書縱觀之披雲為言喪亂之後圖籍散落無幾獨管州者僅存吾欲力紹絕業鋟木宣布有可成之資第未有任其責者耳獨善一身曷若與天下共之通真子再拜曰受教乃立局二十有七役工五百有

奇通校書平陽玄都以總之其於三洞四輔萬八千餘
篇補完訂正出於其手者為多仍增入金蓮正宗記烟
霞錄繹仙嬖仙等傳附焉起丁酉盡甲辰中間奉被朝
旨借力貴近牽合補綴百萬並進卒至於能事穎脫真
風遐布而通真子之道價益重於一時矣通真子記誦
該洽篇什敏捷樂於提誨不立崖岸居玄都垂十稔雖
日課校讐其參玄學受章句自遠方至者源源不絕他
主師席者皆竊有望洋之嘆寶藏既成之五月為徒衆

言寶藏成壞事關幽顯冥冥之間當有陰相者今大緣
已竟吾其行乎越二十有五日夜參半天無陰翳忽震
電風烈大木隨拔遽沐浴易衣蛻形于所居之櫟櫟堂
得年五十有七高弟李志實等以某月日奉其衣冠寧
神於天壇之麓披雲之命也所著林泉集二十卷行於
代往予先君子令陵川予始成童及識通真子之大父
閑居崧山與西溪翁為詩酒之友者十五年通真子以
世契之故與予道相合而意相得也故志實輩百拜求

為其師作銘今年春二月劉志玄者復自濟上訪予新
興冰雪沍寒跋涉千里其勤有足哀者乃為作銘使刻
之松臺其銘曰

昔在窮桑發真源鑿民耳目神始全遭罹元元坤軸旋
壞劫欲墮未開前道山絕業當時傳百於苾芻了大緣
若有人兮靜以專嚮也易老固初筵玄綱力挽孰我先
苦節終志孰我堅網羅落簡手自編寒暑不廢朱黃研
琅函瓊笈閉九淵垂芒八角星日懸司功會計蓋上遷

乃今出餅鳥飛翩安常處順古所賢死而不亡豈其然
華陽九障名一焉豈不委形殆賓天為復延康轉靈篇
為復藍珠參七言為復虎書校三元為復逸度論九玄
寧當七祖歸枯禪松臺有名鶴千年我相夫子非
頑仙

圓明李先生墓表

先生諱志源姓李氏邠之三水人幼有至性宗黨以孝
稱年未三十考妣俱喪因棄家入道師事玉峰周君伐

薪供水執役不少倦積三數年周君憫其勞使之游歷
諸方至醴泉與同業者結茅以居全真家樂與過客餌
道院所往至者如歸嘗歲飢資用乏絕先生辟穀數旬
以供給來者其先人後已類此又十有八年乃築園堵
於三水李氏家三年人莫見其面周君知其有所得也
召之還幽遂主玉峯觀并以法席付之號曰圓明子先
生資稟醇正寡於言論行已接物始終如一時人以其
仁卹周至故有慈孝之目周君亦以為無愧其名也正

大末關中受兵先生避地雒陽及河南破僑寓東阿者
數年初周君以重陽煉化之地號活死人墓者蕪歿已
久每欲葺居之歲甲午關輔畧定先生乃緣其師雅意
率法兄弟諸人分遣徒衆力為經度之是為重陽成道
觀營建未幾即命駕西還先生既老道價益重學者嚮
慕過於玉峰時以丙午秋八月之五日春秋七十有一
反真於成道之中堂以故即其地葬之明年夏四月先
生之同業潘志元周志靜門弟子陳志清來新興踵門

致謁以先生墓表為請曰吾圓明老師營成道訖功將就太原謁文吾子期以秋七月即途而以事不果行遺命吾屬使必成夙志其眷眷于吾子者如是聞吾子亦以普照范君幕府正之王君之故知其名能不以文字使少見於後乎予因問三子者圓明既以名取我以文託我意其臭味必有相同者其言句可得聞乎三子者曰圓明臨終沐浴易衣會法屬與之訣有求遺教者第告之以清淨無為不染不著而已已而復求詩頌圓明

麾之曰吾平生未嘗弄筆墨設強作一語非留病人間乎且近世諸師文編達者猶將以為筌蹄况萬萬不相侔者乎言終怡然而逝圓明平實如此何言句之有哉予止之曰子休矣圓明所得吾得之矣乃為之銘其銘曰

舌吐而吞駟馬追奔孰愈於目擊而道存夫惟不關鍵而閉是謂玄玄之門終南之原若人復其元始於補劓息黥乃今拔本而塞源蓋予許之以忘言之契故以其

不言者而為知言

通玄大師李君墓碑

明昌承安間文治已極天子思所以敦本抑末厚天下之俗既以經明行修舉王礪逸賓張建吉甫文商伯起輩三數公官使之矣至於道家者流潔已求志有可以贊清淨之化者亦特徵焉最後得通玄李君天下翕然以得人歸之蓋君天質冲遠蟬蛻俗外出入世典而無專門獨擅之蔽從容雅道而無山林高蹇之陋一時名

士如竹谿党公世傑黃山趙公文孺黃華王公子端皆以道義締交於君大丞相莘國胥公於人物慎許可及為君作贊至有百世清規之語則君之流品為可見矣君諱大方字廣道世為汾西人父以醫為業母管氏妊十二月夢神人捧日照其室已而君生弱不好弄言語動作率非嬰兒所當有者家人異焉七歲入道師冲佑觀道士郭師禮學有夙昔能日記千言年十二以誦經通得度即辭師往趙城讀書天寧道院積力既久遂窮

藏史之祕至於六經百氏之學亦稱淹通大定初遊闕
中道風藹然有騫飛不羣之目講師郝君道本名重一
時一見君即以大器許之及郝被召君佩上清三洞祕
籙主盟秦雍者餘二十年泰和七年春詔以君提點中
都太極宮事賜號體玄大師俄被旨以祈嗣設大醮君
嚴恭科禁方士誕幻之語未嘗一出諸口徒以精誠感
通遂有萬鶴下臨之應百官表賀文士亦多贊詠召對
稱旨又召入禁中訪道君儀觀秀偉占對詳雅玄談覺

疊聽者忘倦章宗特敬異之衛紹王大安初召君馳驛
詣嶽瀆投金龍玉冊為民求福賜雲錦羽衣仍佩金符
加號通玄大師所至靈應昭著此不具載貞祐南渡君
還居鄉邑因自號北山退翁莘公鎮平陽以歲旱請君
致禱車轍未旋而澍雨霑足時人以神人許之壬午秋
避兵清涼山一日布卦得剝之上九嘆曰吾行矣明日
游騎至擁老幼萬人下山君為門弟子元慶言吾將安
歸乎朝家以我為有道者猥以徵書見及寧當負之耶

而輩第往毋念我為也乃策杖入深谷卧大龕下怡然
而逝春秋六十有四實元光元年九月二十二日也兵
退元慶等奉公衣冠葬於某所癸卯冬予自燕都還太
原道出范陽君之族孫閔持蕭鍊師公弼所錄事跡以
墓表見屬曰吾祖墓木已拱而旌紀寂寥誠得吾子誤
述以著金石傳永久死不恨矣敢百拜以請某謝曰自
予為舉子時熟君名欲造其門然以愚幼未敢也幸當
以不腆之文託君以傳其何敢辭乃為論次之其銘曰

處士素隱方士誕荒天厚通玄畀之玄網相彼少微出
此冀方姑射之山草木有光可陽可陰以柔以剛千仞
壁立屹乎堂堂雖有拱壁駟馬不失其燕處之常巨浸
稽天一簣莫障所謂伊人柴立中央自古皆有死獨有
道者為不亡望君蓬萊海日蒼涼千年一歸裴回故鄉
勒銘墓石維以志衣冠之藏

藏雲先生袁君墓表

先生諱從義字用之族袁氏世為虞鄉著姓母娠十二

月而生且有神光照室之異幼沉默不好為童子劇及
長儀觀秀偉音聲如鐘識者知其不凡年十九入道師
事玉峯胡先生于金玉峯道風儒業名動京師年八十
章宗特徵授禮官先生盡傳其學通經史百家旁及釋
典亦稱該洽而於易學蓋終身焉初親舊以先生龍蟠
鳳翥有雲漢之望勸之就舉選先生薄於世味不之屑
也中條靈峯觀唐賢羅通舊隱歲久頽圯不庇風雨先
生率同志麻長官平甫共葺之命高弟喬知先象之居

焉結茅此山之王官谷近司空表聖休休亭故基是為
藏雲道院先生因以藏雲自號種竹餘三十畝山田二
頃足充賓客之奉先生道價既重州郡長吏到者率詣
山門致謁禮部開閣趙公周臣內翰屏山李公之純每
見必厚相慰藉玄以詩什為贈中朝名勝如史季充王
隆吉羅鳴道李欽止吉仲器馬元章王可道許德臣元
禮昆季皆就傳易道自餘成業于先生之門者又不知
幾何人矣先生資樂易行已接物得於吾孔孟書者為

多事母孝故生平未嘗遠出母年九十終於隱所葬祭如禮州里稱焉里中孤幼不能自存者先生收養之躬自教督使有受學之漸既長又為之婚娶如是十餘輩其後俱有所成雅好醫術病者來以藥請賴以全濟者甚衆兵後歲飢民無所於糴盡出餘粟以贍貧者或時出鄉人爭延致之談經誦道言笑彌日凡今世道家祭醮章奏皆鄙而不為嘗獨行山間遇異人自稱衡岳主者蕭正之謂先生三世學道乃今有成吾於蓬山仙註

院見吾子名氏却後當為孝廉貞淨仙人代鄭雲叟為
少室伯主司真洞天言訖失所在然先生自以為不敢
當也正大甲申朔方兵再畧蒲解先生避亂山陽史華
國家已而保聚被攻先生義不受辱顧謂弟子言吾往
矣乃閉息土室中怡然而逝年六十六時二月十有四
日也猶子致中等葬之山麓之南所著易畧釋列子章
句莊子畧解雲菴妙選方傳於世始予罷內鄉致中介
於劉鄧州光甫丐予文以表先生之墓及官京師見聞

閑公亦以為言并以挽詩見示朔南喪亂因循未暇而予心未始忘也丁未春芮城李邦彥過吾州邦彥先生鄉曲與之游甚款用是重以斯文為請予問邦彥藏雲所以為天下所高可得聞乎邦彥言藏雲隱節可以配古人而器量可以奉至尊吾不知其他予捧手曰有是哉乃為次第之其銘曰

山澤與之臞道味與之腴翩翩獨征遊物之初謂當風岸絕出而莫可接乃溫兮其玉如以君為黃冠師

耶合煉之刀圭襍禮之綿絕又非句漏令寇謙之之
徒況乞靈於綠囊進技於黃襦勸義人倫之先盡驩
菽水之餘洗心有經先天有圖絕學我傳宿惑爾祛
以君為縫掖生耶胡不繁文以拘而脂膏以濡嗒焉
尸居奮而亨衢塞為瓠壺震驚八區其卷其舒其知
其愚之人也吾無以命之殆方內之外而方外之內
者歟


告山贊禪師塔銘

龍興汴禪師為予言汴落髮於告山贊公承事五六年始避兵而南北歸贊公去世已久師生於正隆初而歿於興定之末年年過六十但以喪亂之後時輩凋喪師之行事無從攷按至於卒葬時日亦不能知今所知者特某甲未南渡時事耳吾子嘗試聽之師諱法贊出於兗州侯氏自幼出家事滋陽明首座大定間以誦經通得僧服即以義理之學從事根性穎利同學者少所及游叅扣詰洞見深祕得法於告山明和尚嗣法靈岩才

師即大名曾孫也出世住告山方世路清夷禪林軌則
未改師道風藹然為諸方所重再住兗州之普照州倅
信都路公宣叔文翰之外兼涉內典與師為淘汰之友
師開堂宣叔具文疏朝服施敬繼為先大夫薦冥福禮
有加焉其為中朝名勝所推服如此汴老矣尚能記師
沉嘿自守不以文字言語驚流俗為門戶計住持不務
營造學者雖多迄無授記者行義如是而使之隨世磨
滅門人弟子實任其責竊不自揆度敢以謬述為請幸

吾子惠顧之不肖交於汴公者三十餘年矣汴南遷後
嗣法虛明亨公在法兄弟最後蒙印可於臨濟一枝亭
亭直上不為震風凌雨之所摧偃龍興焚蕩之餘破屋
數椽日與殘僧三四輩灌園自給不肯輕傍時貴之門
予嘗以五言贈之有大道疑高塞禪枯耐寂寥蓋頭茅
一把繞腹蔑三條之句意其孤峻自拔如此必有所從
來循流測源乃今知所自矣因畧記贊公遺事故兼及
之歲丁巳夏五月二十有五日河東人元某書

遺山集卷三十一



總校官庶吉士臣張能照

校對官檢討臣龔大萬

謄錄監生臣李士勳